

Hutan ditarah antara punca banjir

Georgetown: Kegiatan penerokaan kawasan hutan semula jadi di Pulau Pinang yang tidak dikawal kerajaan negeri didakwa antara punca banjir kilat semakin kerap berlaku di negeri ini.

Kejadian banjir yang berlaku di Batu Maung, Kepala Batas dan Bukit Mertajam semalam, adalah bukti kerajaan negeri gagal mengawal aktiviti penarahan bukit sehingga keluasan hutan semula jadi semakin berkurangan.

Presiden Sahabat Alam Malaysia (SAM), SM Mohamed Idris, berkata sudah tiba masanya kerajaan negeri

menguatkuasakan aktiviti penarahan bukit dengan lebih tegas termasuk menggunakan undang-undang sedia ada.

"Kita sedia maklum kerajaan negeri mempunyai beberapa undang-undang berhubung pembangunan di lereng bukit, namun pelaksanaannya diragui.

"Pihak SAM amat risau jika suatu hari nanti Pulau Pinang berhadapan banjir lumpur yang teruk akibat aktiviti penarahan bukit. Kerajaan negeri perlu bertindak segera sebelum masalah ini melarat," katanya ketika dihubungi BH, semalam.

Kelmarin, Penang Forum turut mendakwa kawasan hutan semula jadi Pulau Pinang berkurangan sebanyak 7.4 peratus, dipercayai berpunca daripada aktiviti pembangunan tidak dirancang serta penarahan bukit yang tidak terkawal.


Pertubuhan bukan kerajaan (NGO) itu melaporkan menerima 112 laporan awam berhubung kegiatan penarahan bukit, selain terdapat 86 laporan dibuat orang ramai kepada Majlis Bandaraya Pulau Pinang (MBPP) berhubung perkara sama.

Sementara itu, kerajaan DAP Pulau Pinang semalam, terus

menuding jari terhadap Kerajaan Persekutuan berhubung masalah banjir kilat yang melanda negeri itu.

Ketua Menteri, Lim Guan Eng berkata masalah banjir di Batu Maung berpunca daripada sistem saliran yang tersumbat akibat pembinaan lebuh raya menghubungkan Bayan Lepas ke Batu Maung.

"Projek lebuh raya itu dilakukan kerajaan Pusat, tetapi ini bukan masa untuk bergaduh. Kita juga sudah minta kontraktor mendalam dan melebarkan sistem saliran supaya banjir kilat tidak berlaku lagi," katanya.



Kerajaan negeri perlu bertindak segera sebelum masalah ini melarat"

SM Mohamed Idris,
Presiden SAM